

# Unammilleqatigiinnermut Ataatsimiititaliap suleriaasissaa taassumalu suliasai pillugit Namminersorlutik Oqartussat nalunaarutaat

Unammilleqatigiinneq pillugu inatsisartut inatsisaat (unammilleqatigiinnermut inatsit ) nr. 1, 15. maj 2014-imeersoq § 26, imm. 3 malillugu ima aalajangiineqarpoq:

## Kapitali 1

### *Unammilleqatigiinnermut Ataatsimiititaliaq*

§ 1. Unammilleqatigiinnermut Ataatsimiititaliap unammilleqatigiinnermut inatsisip taassumalu malitsigisaanik maleruagassat aalajangerneqarsimasut aqunneqarnissaat pingaarnersaallutik akisussaaffigai.

*Imm. 2.* Unammilleqatigiinnermut Ataatsimiititaliaq unammilleqatigiinnermut inatsisip aqunnerani Naalakkersuisunut attuumassuteqanngilaq.

§ 2. Unammilleqatigiinnermut Ataatsimiititaliaq inuussutissarsiornermik ingerlataqartut atuisartullu soqutigisaannut attuumassuteqanngitsumik siulittaasup tullianik toqqaassaaq. Siulittaasup tullia siulittaasumut sinniisaavoq.

*Imm. 2.* Ilaasortaq toqqarneqarnermini inuussutissarsiornermik ingerlataqartut atuisullu soqutigisaannut attuumassuteqanngitsaq, piffissami atuuffigisamini inuussutissarsiornermi suliffeqarfinnut, inuussutissarsiornermi kattuffinnut imaluunniit atuisartut kattuffinut taama attuumassuteqalissagalaruni, taamaalillunilu arlaannut attuumassuteqannginnissamut piumasaqaat eqquutikkunnaarlugu, ilaasortaq Unammilleqatigiinnermut Ataatsimiititaliamit tunuassaaq. Taamaalereerpat ilaasortaagaluartup piffissap atuuffissaraluata sinneranut Naalakkersuisut ilaasortamik allamik toqqaassapput.

*Imm. 3.* Nalunaarut manna malillugu ilaasortaq nipangiussisimasussaataitanerminik unioqqutitsisimappat imaluunniit pisussaaffimminik annertuumik sumiginnaasimappat tunuartinneqarnissaa pillugu siulittaasoq Naalakkersuisunut inassuteqarsinnaavoq.

*Imm. 4.* Unammilleqatigiinnermut Ataatsimiititaliamut ilaasortat tamarmik unammilleqatigiinnikkut niueqatigiinnikkullu pissutsinik piffissamut tulluuttunik piginnaaneqassapput kiisalu pissutsinik unammilleqatigiinnermut inatsimmi § 27, 3. pkt.-imi taaneqartut arlaannik arlalinnulluunniit annertuumik ilisimasaqartussaallutik.

*Imm. 5.* Unammilleqatigiinnermut Ataatsimiititaliamut ilaasortat Unammilleqatigiinnermut Ataatsimiititaliami atuunnerminni arlaannut attuumassuteqarnatik sulissapput, taamaalillutillu

ilaasortaanertik arlaannut attuumassuteqanngitsumik peqqissaartumik torersumillu ingerlatissallugu.

*Imm. 6.* Kattuffiit ilaasortanik innersuussisinnaatitaasut, ilaasortassanik Unammilleqatigiinnermut Ataatsimiititaliamut innersuussinnerminni imm. 4-mi piumasaqaatit taaneqartut tungaasigut eqquutsisisinnaasutut tunngavilersuuteqarlutik ilaasortanik innersuussissapput.

**§ 3.** Inuussutissarsiornermi kattuffiit makku ataatsimoorlutik Unammilleqatigiinnermut Ataatsimiititaliamut ilaasortamik ataatsimik inassuteqarsinnaatitaapput:

- 1) Sulisitsisut
- 2) NUSUKA.

## **Kapitali 2**

### *Piginnaatitaanerit aamma aalajangiinerit*

**§ 4.** Unammilleqatigiinnermut Ataatsimiititaliaq, Naalakkersuisunit peqquneqarnermigut, unammilleqatigiinnermut inatsit malillugu maleruagassanik aalajangiinissamut atatillugu oqaaseqaateqartassapput.

**§ 5.** Unammilleqatigiinnermut Ataatsimiititaliaq nammineq piumassutsini malillugu, nalunaarutiginninnerit malillugit, imaluunniit maalaaruteqarnerit tunngavigalugit sulianik sammisaqarsinnaavoq, tak. unammilleqatigiinnermut inatsimmi § 26, imm. 1, 2. pkt.

*Imm. 2.* Unammilleqatigiinnermut Ataatsimiititaliaq pisortani oqartussanut tunngavilersuuteqarluni oqaaseqaatinik nalunaarutigisat pillugit aalajangiissaaq, unammilleqatigiinnermut ajoqutaasumik sunniutaasinnaasut kiisalu sammisami pineqartumi unammilleqatigiinneq siuarsarniarlugu uparuarlugit, tak. unammilleqatigiinnermut inatsimmi § 2, imm. 4.

*Imm. 3.* Unammilleqatigiinnermut Ataatsimiititaliaq sammisat tunngavissaqarluartut imaluunniit immikkut ittumik pingaaruteqarluinnartut pillugit aalajangiissaaq.

*Imm. 4.* Unammilleqatigiinnermut Ataatsimiititaliap unammilleqatigiinnermut inatsit malillugu aalajangigai ilaasortat kikkut suliap sammineqarnerani peqataasimanersut pillugit paasissutissanik imaqassapput.

*Imm. 5.* Ataatsimiititaliap suliaqarnera pillugu nassuiaatit paasissutissallu Atuisartunut Unammilleqatigiinnermullu Aqutsisoqarfiup tamanut saqqummiussinnaavai.

**§ 6.** Unammilleqatigiinnermut Ataatsimiititaliaq suliamik sammisaqarnissamik kinguartitsinissaq pillugu aalajangersinnaavoq, paasissutissanik amerlanerusunik pissarsiornissamut pisariaqarpat, taamattaq Unammilleqatigiinnermut Ataatsimiititaliaq sulianik immikkut ilisimasaqartut Unammilleqatigiinnermut Ataatsimiititaliap suliarinninneranut peqataaqullugit qinnuigisinnaallugit. Sulianik ilisimasaqartut suliffeqarfinnut imaluunniit suliffeqarfinnut kattussimasunut suliamik suliarinninnerminni peqataaffigisaminnut attuumassuteqassagunik soqutigisaqassanngillat imaluunniit attuumassuteqarfeqassanngillat.

## **Kapitali 3**

### *Unammilleqatigiinnermut Ataatsimiititaliap allattoqarfia*

**§ 7.** Unammilleqatigiinnermut Ataatsimiititaliap allatseqarnikkut suliai Atuisartunut

Unammilleqatigiinnermullu Aqutsisoqarfimmit isumagineqartarput.

*Imm. 2.* Atuisartunut Unammilleqatigiinnermullu Aqutsisoqarfiup suliassai pisinnaatitaaffilu Atuisartunut Unammilleqatigiinnermullu Aqutsisoqarfiup suliassai pillugit Namminersorlutik Oqartussat nalunaarutaani aalajangersarneqarput.

## **Kapitali 4**

### *Siulittaasup pisinnaatitaaffi*

**§ 8.** Unammilleqatigiinnermut Ataatsimiititaliap siulittaasuata Unammilleqatigiinnermut Ataatsimiititaliap ataatsimiinneri pilersarusiussavai aqullugillu, tamatumunngalu atatillugu ilaatigut makkuninnga pisinnaatitaaffeqarluni.

- 1) Oqaasiinnartigut ilanngussaqaarnissamut sivilissusissaanullu piffissamik aalajangersaanissaq.
- 2) Oqaasiinnartigut ilanngussaqaarnissamik piareersarnermut tunniussinermullu atatillugu suleriaasissaq pillugu aalajangiinissaq, ilanngullugu § 10, imm. 4, uniffik siullermi oqaatigineqartutut sunniteqartussamik piffissaliussanik aalajangersaaneq.
- 3) Ilangussaqaarneq pissutsinut suliame aalajangiinissamut pingaaruteqanngitsunut tunngasimappat imaluunniit innersuussippat, oqaasiinnartigut ilanngussaqaarnissamik mattussineq.
- 4) Sammisat taasissutaasussat inissitsiternerit.
- 5) Unammilleqatigiinnermut Ataatsimiititaliap isumaqatiginninniarsimaneri pillugit isummerfigissallugit.
- 6) Allanguutissatut siunnersuutit taasissutigineqarnissaasa tulleriiaarnissaannut aalajangiissalluni.
- 7) Ataatsimiinnermut oqaluuserisassani allanguissalluni.

*Imm. 2.* Paasissutissanik illersuilluni mianersuussuteqaarnissaq pillugu siulittaasoq inaarutaasumik aalajangiissaq, tak. § 15, imm. 2.

*Imm. 3.* Suliat ataatsimiititaliap aalajangiiffigisassaatus pisussaaffi, ataatsimiititaliallu ataatsimiinnissaanut utaqqissunneqarsinnaanngitsut pillugit siulittaasoq Atuisartunut Unammilleqatigiinnermullu Aqutsisoqarfimmi pisortaq peqatigalugu aalajangiisnaavoq. Aalajangiinerit taamaattut pillugit Unammilleqatigiinnermut Ataatsimiititaliap tulliani ataatsimiinnerani nalunaarutigineqassapput.

*Imm. 4.* Allaganngorlugit najoqqutassat ataatsimiititaliap ataatsimiinnerani aatsaat agguarneqarnissaat ataatsimiinnerullu naammassinerani utertinneqarnissaat pillugu siulittaasoq aalajangersinnaavoq.

## **Kapitali 5**

### *Ataatsimiinnerit*

**§ 9.** Unammilleqatigiinnermut Ataatsimiititaliaq ulluni ataatsimiiffissatut Unammilleqatigiinnermut Ataatsimiititaliamit akuerineqarsimasaanni ataatsimiittassaaq, imaluunniit siulittaasup tamatumunnga pequtissaqartitsinera malillugu qanorluunniit akulikitsigisunik ataatsimiittassaaq.

*Imm. 2.* Ataatsimiinnissanut sivikinnerpaamik ulluni 14-inik sioqqutsisumik kalerriilluni aggersaasoqartassaaq, suliaq nukinginnassusia eqqarsaatigalugu siulittaasoq allamik aalajangiisimangippat.

*Imm. 3.* Ataatsimiinnissamut aggersaaneq oqaluuserisassanik malitseqassaaq, suliat sammineqartussat pillugit sapinngisamik imaqarnerinik nalunaarutiginnittumik, najoqqutassallu sulianik samminninnissanut pisariaqartitanik ilanngussisoqartussaalluni, takuulli § 8, imm. 4.

*Imm. 4.* Ilaasortat ataatsimiinnermi peqataasinnaanngitsut, tamanna pillugu sapinngisamik piaarnerpaamik Atuisartunut Unammilleqatigiinnermullu Aqutsisoqarfimmut nalunaarutigissavaa.

*Imm. 5.* Atuisartunut Unammilleqatigiinnermullu Aqutsisoqarfup pisortaa, taassumalu aalajangigaa malillugu Atuisartunut Unammilleqatigiinnermullu Aqutsisoqarfup sulisui allat taasisinnaatitaanatik Unammilleqatigiinnermut Ataatsimiititaliap ataatsimiinneranni peqataasassapput.

*Imm. 6.* Unammilleqatigiinnermut Ataatsimiititaliap ataatsimiinneri tamanut ammasuunngillat.

**§ 10.** Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, Unammilleqatigiinnermut Ataatsimiititaliap suliami aalajangiinnginnerani Unammilleqatigiinnermut Ataatsimiititaliamut oqaasiinnartigut naatsumik ilanngussisinnaatitaapput. Ilangussinerup sivilissusaata, siulittaasoq § 8, imm. 1, nr. 1 naapertorlugu allatut aalajangersaasimanngippat, minutsit 10-it qaangissanngilai. Oqaasiinnartigut ilanngussaqaarniarloq allanit sinnisoqarsinnaavoq imaluunniit ikiorneqarsinnaalluni.

*Imm. 2.* Suliami allaganngorlugit najoqqutassat annertunerpaatigut Unammilleqatigiinnermut Ataatsimiititaliamit ilisimaneqartut naatsorsuutigineqarsinnaavoq, taamaattumillu oqaasiinnartigut ilanngussaqaarneq suliami pissusiviusuni inatsisitigullu pisunik annertunerusumik itisiliinnermut imaluunniit paasinarsisitsinnermut taamaallaat tunngassuteqassaaq. Oqaasiinnartigut ilanngussaqaarnermut nangissutigalugu, siulittaasup akuersineratigut, ilanngussaqaartumut itisiliisunik apeqquteqarnissaq periarfissaqarpoq.

*Imm. 3.* Oqaasiinnartigut ilanngussisoq imaluunniit ilanngussisut, ataatsimiinnissaq sioqqullugu allakkiamik Atuisartunut Unammilleqatigiinnermullu Aqutsisoqarfimmut nassiussinissamut pissusaafeqarpoq, tassani pisut pissusiviusut taamatullu inatsisinut tunngasut tamarmik, ataatsimiinnerup nalaani eqqartorneqartussat, takussutissianngorlugit allassimassallutik. Siulittaasup tamatumunnga killissaliussaq erseqqinnerusoq aalajangersassavaa, takuuk § 8, imm. 1, nr. 2.

*Imm. 4.* Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, piffissaliussaq siulittaasumit aalajangersarneqartoq, takuuk § 8, imm. 1, nr. 2, malinngippassuk imaluunniit allatigut Atuisartunut Unammilleqatigiinnermullu Aqutsisoqarfik nalunaarfigippassuk, pineqartoq ataatsimiinnermi Unammilleqatigiinnermut Ataatsimiititaliap suliami aalajangiinnissaa naatsorsuutigineqartumi najuussinnaanngitsaq, Unammilleqatigiinnermut Ataatsimiititaliamut ataatsimiinnerup nalaani oqaasiinnartigut naatsumik ilanngussaqaarnissamut pisinnaatitaaffeqarneq annaaneqassaaq. Taamaattoq pineqartoq taamatut pisoqartillugu tamatumunnga taarsiullugu Unammilleqatigiinnermut Ataatsimiititaliami ataatsimiinnissaq sioqqullugu Atuisartunut Unammilleqatigiinnermullu Aqutsisoqarfup ataatsimeeqatiginissaanik neqeroorfigineqassaaq. Atuisartunut Unammilleqatigiinnermullu Aqutsisoqarfup Unammilleqatigiinnermut Ataatsimiititaliaq pineqartumik ataatsimeeqateqarneq pillugu ilisimatissavaa.

*Imm. 5.* Ataatsimiinnermit Unammilleqatigiinnermut Ataatsimiititaliap suliami aalajangiinnissaanik naatsorsuutigineqartumit, Unammilleqatigiinnermut Ataatsimiititaliap aalajangiinerani pineqartoq imaluunniit pineqartut takkutinngitsoorpata, Unammilleqatigiinnermut Ataatsimiititaliaq tunngavissat pigineqartut tunngavigalugit suliami aalajangiinnaavoq.

*Imm. 6.* Unammilleqatigiinnermut Ataatsimiititaliap aalajangiinnerani pineqartoq imaluunniit pineqartut, taamaallaat oqaasiinnartigut ilanngussaqaarnissamut imaluunniit ilanngussaqaarnissanut, aammalu tassunga atatillugu apeqqtissaasinnaasunut atatillugu Unammilleqatigiinnermut Ataatsimiititaliami ataatsimiinnerup nalaani najuussinnaatitaapput.

## **Kapitali 6**

### *Oqaluuserisassat*

**§ 11.** Unammilleqatigiinnermut Ataatsimiititaliap ataatsimiinnerini oqaluuserisassani immikkoortutut aalajangersimasutut makku ilaassapput:

- 1) Unammilleqatigiinnermut Ataatsimiititaliaq maleruagassat malillugit aggersarneqarsimasoq pillugu siulittaasup nalunaarutiginninnera, ataatsimiititaliarlu aalajangiisinnaassuseqarneris, kiisalu ilaasortat ilaat arlaannut attuumassuteqartuunersut.
- 2) Unammilleqatigiinnermut inatsisip ulluinnarni aqunneqarnera pillugu Unammilleqatigiinnermut Ataatsimiititaliaq sinnerlugu Atuisartunut Unammilleqatigiinnermullu Aqutsisoqarfiup pisortaanit nalunaarut.

*Imm. 2.* Tamakku saniatigut suliat ingerlaavartut apeqqtillu allat unammilleqatigiinnermut inatsisip nassuiarnissaanut tunngasut sammineqarnissaat pillugu Unammilleqatigiinnermut Ataatsimiititaliaq piumasqaarsinnaavoq

## **Kapitali 7**

### *Taasisarnermi maleruagassat*

**§ 12.** Siulittaasoq, taassumaluunniit najuutinnginnerani siulittaasup tullia, ikinnerpaamillu ilaasortat arfiniliusut (6) sinneri pingasut (3) najuutsillugit Unammilleqatigiinnermut Ataatsimiititaliaq aalajangiisinnaassuseqarpoq.

*Imm. 2.* Unammilleqatigiinnermut Ataatsimiititaliaq taasinermi nalinginnaasumik amerlanerussuteqarnikkut aalajangiisarpoq. Taasinerit amerlaqatigiinnerini, sulittaasup taassumaluunniit najuutinnginnerani siulittaasup tullia taasineri aalajangiisuusaaq.

## **Kapitali 8**

### *Allattuiffiit Protokol*

**§ 13.** Unammilleqatigiinnermut Ataatsimiititaliap ataatsimiinnerini tamani Atuisartunut Unammilleqatigiinnermullu Aqutsisoqarfik protokolimut allattuissaaq, tassani makku allattorneqassallutik:

- 1) Suliat sammineqarnerini ilaasortat kikkut peqataasimanersut.
- 2) Sulianut ataasiakkaanut tunngatillugu Unammilleqatigiinnermut Ataatsimiititaliap aalajangiinneri. Taasisoqarnerani taasinerit kisitsisitali allanneqassapput.
- 3) Unammilleqatigiinnermut Ataatsimiititaliap aalajangernerumut tunngavilersuutaa, tunngavilersuut suliap aalajangiiffiqineqarnissaanut Atuisartunut Unammilleqatigiinnermullu Aqutsisoqarfiup missiliutaanit allaanerusimappat.

4) Ikinnerussuteqartut isummernerat, pisariaqartitsinerlu malillugu tamatumunnga tunngavilersuutit.  
5) Arlaannut attumassuteqartuuneq pillugu aalajangerneq. Ilaasortaq arlaannut attuumassuteqartuusutut isigineqartoq, arlaannut attuumassuteqartuuneq pillugu apeqqummut tunngasoq  
Unammilleqatigiinnermut Ataatsimiititaliap aalajangigaa pillugu akerliliinini protokolinit ilanngullugu allanneqarnissaa piumasarisinnaavaa.

*Imm. 2.* Unammilleqatigiinnermut Ataatsimiititaliamut ilaasortat ataatsimiissimanerup kingorna kingusinnerpaamik ullut 14-it qaangiutinnginnerini protokolinit allattuiffiit assilinerinik nassinneqarsimassapput. Ilaasortanit ataatsimiinnermi peqataasimasunit protokolimut allassimasut pillugit akerliliissutit aamma naqqiutissatut siunnersuutit protokolip tigoreerneranit kingusinnerpaamik ullut 7-it qaangiutinnginnerini allaganngorlugit Atuisartunut Unammilleqatigiinnermullu Aqutsisoqarfimmut nassiunneqassapput.

*Imm. 3.* Protokoli tamanut saqqummiunneqartussaangilaq.

## **Kapitali 9**

### *Arlaannut attuumassuteqarneq*

**§ 14.** Unammilleqatigiinnermut Ataatsimiititaliamut ilaasortaq suliap sammineqarnerani, pisortat ingerlatsineranni sulianik sammisaqartarneq pillugu inatsisartut inatsisaat malillugu ilaasortaq suliami arlaannut attuumassuteqaruni aalangiisinnaatitaangilaq, aalangiinnermi peqataasinnaangilaq imaluunniit suliap sammiunneqarnerani arlaatigut peqataasinnaanani.

*Imm. 2.* Ilaasortaq pissutsinik nammeneq suliamut arlaatigut attuumassuteqarsinnaanerminut nalornissutaasinnaasoq pillugu ilisimaleruniuk tamanna pillugu piaarnerpaamik Atuisartunut Unammilleqatigiinnermullu Aqutsisoqarfik nalunaarfigissavaa.

*Imm. 3.* Ilaasortaq pineqartoq peqataatinnagu taanna arlaanut attumassuteqarnerneq pillugu Unammilleqatigiinnermut Ataatsimiititaliaq aalangiissaaq.

## **Kapitali 10**

### *Nipangiussisimasussaatitaaneq*

**§ 15.** Unammilleqatigiinnermut Ataatsimiititaliamut ilaasortat, sulianullu immikkut ilisimasallit § 6-imi taaneqartut, pisortat ingerlatsineranni sulianik sammisaqartarneq pillugu inatsisartut inatsiaani maleruagassat malillugit nipangiussisimasussaatitaanermik malinnittussaapput.  
Nipangiussisimasussaatitaanermut ilaapput paasissutissat suulluunniit, ilaasortap pineqartup imaluunniit sulianik immikkut ilisimasallit Unammilleqatigiinnermut Ataatsimiititaliami atuunnerminnut atatillugu ilisimalersimasaat, assersuutigalugu tamakkununnga ilaallutik suliffeqarfiit aningaasarsiornikkut niuernikkullu atugaat pillugit paasissutissat, kiisalu paasissutissat allat suliffeqarfimmut pineqartumut pingaaruteqartut.

*Imm. 2.* Suliffeqarfiup paasissutissanik teknikkimut tunngasunik saqqummiussinerani, tamakkununnga ilaallutik ilisimatusarnerit, tunisassioriaatsit, tunisassiat kiisalu ingerlatsinerneq niuernermilu isertuussat, unammilleqatigiinnermut inatsimmi § 30 malillugu inuk paasissutissanik Unammilleqatigiinnermut Ataatsimiititaliamut saqqummiussisussaq, Unammilleqatigiinnermut Ataatsimiititaliap siulittaasuanut piumasaqarsinnaavoq, paasissutissat tunniunneqassanngitsut imaluunniit tamanit

pissarsiarineqarsinnaassanngitsut, tamakkunungattaaq ilaallutik Unammilleqatigiinnermut Ataatsimiititaliamut ilaasortat. Paasissutissat qanoq annertutigisumik qanorlu ilusilerlugit saqqummiunneqartariaqarnersut pillugit siulittaasoq inaarutaasumik aalajangiissaaq.

## **Kapitali 11**

### *Atuutsinneqalerfissaa*

**§ 16.** Nalunaarut manna atuutsinneqalissaaq ulloq 15. agusti 2015.

*Imm. 2.* Tamatumunnga ilutigitillugu Unammilleqatigiinnermut Ataatsimiititaliap suleriaasissaa taassumalu suliassai pillugit Namminersornerullutik Oqartussat nalunaarutaat nr. 2, 1. februar 2008-meersoq atorunnaarsinneqarpoq.

*Namminersorlutik Oqartussat, ulloq 23. juuli 2015.*

Vittus Qujaukitsoq

/

Jørn Skov Nielsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut